

Približimo se Allahu dž.š. u Ramazanu

Svemogući Allah u Kur'anu kaže:

مَا يَفْعَلُ اللَّهُ بِعَدَابِكُمْ إِنْ شَكَرْتُمْ وَآمَنْتُمْ وَكَانَ اللَّهُ شَاكِرًا عَلِيمًا .

“Zašto bi vas Allah kažnjavao ako budete zahvaljivali i vjerovali? Allah je blagodaran i sveznajući.”
(En-Nisa, 147.)

وَسَنَجْزِي الشَّاكِرِينَ .

„I sigurno ćemo zahvalne nagraditi.“ (Ali Imran, 145.)

Draga i poštovana braćo!

Jedno od lijepih svojstava svakog muslimana jeste (hamd) zahvala Allahu, dž.š., koja je povezana sa (rida) zadovoljstvom onim što nam je Allah, dž.š. podario. Ako se zahvaljujemo ljudima za njihovu ljubaznost, dobrotu i darove, kako onda možemo biti a da se ne zahvaljujemo Allahu, dž.š., kome pripada sve što je na nebesima i na zemlji i sa čijim darovima i blagodatima ništa se ne može porediti!? Ako znamo zahvaljivati ljudima, onda trebamo biti zahvalni i Allahu, dž.š., a Muhammed, a.s., kaže:

„Ko ne zna zahvaljivati ljudima, taj nije zahvalan ni Allahu.“

Na žalost, većina ljudi nije svjesna Allahovih blagodati, jer nisu na ispravan način učili o svom Gospodaru, a Allah, dž.š. kaže:

يَعْمَلُونَ لَهُ مَا يَشَاءُ مِنْ مَحَارِبٍ وَتَمَائِيلٍ وَجِفَانٍ كَالْجَوَابِ وَقُدُورٍ رَاسِيَاتٍ ۗ اعْمَلُوا آلَ دَاوُدَ شُكْرًا ۗ وَقَلِيلٌ مِّنْ عِبَادِيَ الشُّكُورُ

„Sve blagodati koje imate su od Allaha. - A malo je zahvalnih među robovima Mojim“. (Sebe', 13.)

Zahvala Svevišnjem Allahu se manifestuje kroz zahvalu srcem, tako što će naše srce biti zahvalno i zadovoljno Allahom dž.š. kroz zahvalu jezikom (izgovaranjem) i kroz zahvalu cijelim našim bićem i organima (practiciranjem).

Kad znamo činjenicu, da sve što imamo ne bismo mogli imati bez Allahove dž.š. volje, onda ćemo stalno zahvaljivati našem Stvoritelju, a posebno u nastupajućem mubarek mjesecu koji prema takvimu Rijasetu islamske zajednice u Bosni i Hercegovini, nastupa u utorak 15. 5. 2018. g. To je mjesec sabura, ustezanja, ibadeta, dobročinstva, mjesec duhovnog i moralnog uzdizanja i škola morala i moralnosti.

Potrebno je pripremiti se za nastupajući mjesec ramazan. Stoga,

- Potrudimo se završiti sve poslove, obaveze koje nam oduzimaju vrijeme i udaljavaju nas od ibadeta, prije nastupanja mjeseca ramazana i podsjećajmo svoje ukućane na radost i njegovu ljepotu, privikavajući ih na post i povećanje ibadeta.
- Za svakog vjernika od sveg najvažnije je učiniti tevbu-pokajanje za sve prijašnje grijeha i pogreške i obećati Svemogućem Allahu da se više njihovom činjenju nećemo vraćati.
- Insan je najbliži svome Gospodaru na sedždi, u namazu, a Svevišnji kaže:

...وَأَسْجُدْ وَاقْتَرِبْ .

“...molitvu obavljaj i nastoj da se Gospodaru svome približiš!” (Alek,19)

Stoga, povećajmo činjenje sedžde, namaza i nafila, jer svaki put kad sedždu učinimo, Allah nas uzdigne za jednu deredžu (stepen) i poništi nam i izbriše jedno loše djelo.

- Svemogući Allah u suri Merjem kaže: **خُذِ الْكِتَابَ بِقُوَّةٍ** "...*prihvati knjigu odlučno!*...", što nam ukazuje da trebamo voditi računa o svakodnevnom učenju Kur'ana. Jedan dio učenja iz Kur'ana, treba biti namijenjen srčanom promišljanju o ajetima (razumijevanju i primjeni pročitano kur'anskog teksta, božanskog govora upućenog baš nama) i drugi dio učenja iz Kur'ana, namijenjen stjecanju i prikupljanju sevaba i dobrih djela.
- Da bismo upotpunili svoj iman, nastojmo bolje razumjeti i spoznati sve o Allahu dž.š. i približiti Mu se kroz proučavanje značenja Njegovih lijepih imena i svojstava - Esmaul-husna i učenje kur'anskih i drugih dova iz sunneta Allahovog Miljenika Muhammeda, s.a.v.s. Dovimo Mu za uputu, halal imetak, bereket u životnom vijeku i hairli djelima i za bereket u vremenu, posebno u današnje doba užurbanosti i nedostatka vremena.
- Trudimo se što više druge savjetovati i upućivati na ono što je hajr-dobro, citiranjem kur'anskih ajeta i Poslanikovih, s.a.v.s. hadisa, mudrih izreka ashaba i pobožnih ljudi. Nastojmo slušati dersove i vazove kako bismo crpili pouku za sebe i svoje ukućane.
- Povećajmo činjenje nafila u namazu i dobročinstvu i neka nam je dovoljan savjet, hadisi kudsijj u kojem Svevišnji Allah kaže:

"Moj mi se rob približava nafilama, sve dok ga ne zavolim...", pa nastojmo biti od onih koje Svevišnji voli.

- Izbacimo dunjaluk iz svoga srca i uzmimo pouku iz praktičnog primjera u kojem Svevišnji Allah kaže:

لَنْ تَنَالُوا الْبِرَّ حَتَّى تُنْفِقُوا مِمَّا تُحِبُّونَ ۚ وَمَا تُنْفِقُوا مِنْ شَيْءٍ فَإِنَّ اللَّهَ بِهِ عَلِيمٌ.

"Nećete zaslužiti nagradu sve dok ne udijelite dio od onoga što vam je najdraže, a bilo šta vi udijelili, Allah će, sigurno, za to znati." (Alu 'Imran,92)

Udijelimo, darujmo od onoga što najviše preferiramo, od hrane koju volimo, od igračaka koje naša djeca i mi sami volimo, od imetka, novca koji imamo i koji je i nama samim potreban.

- Borimo se protiv svojih slabosti i prohtjeva i recimo im NE... NE prekomjernom spavanju, NE prekomjernom gledanju TV-a, filmova, sporta, serijala, NE prekomjernom izbivanju na društvenim mrežama i platformama, NE ogovaranju, prenošenju tuđih riječi i ružnom govoru, NE dosađivanju i gubljenju vremena, NE svim drugim lošim navikama.
- Popravimo i poboljšajmo svoje ponašanje prema drugima, a POSEBNO prema onim prema kojim imamo dužnosti i obaveze. Udaljimo se i iskorijenimo odnose koji su nam "za vratom", poput neposlušnosti prema roditeljima, ružnog i nedostojnog odnosa prema supružniku, nasilničkog i grubog odnosa prema bratu ili sestri po krvi ili u islamu, neprikladnog odnosa prema komšiji itd.
- Oživimo razmišljanja i snove o džennetu, dovimo Svevišnjem Allahu da nam podari najviše njegove stupnjeve i tražimo utočište i zaštitu od vatre džehennemske i prisjetimo se da je ramazan mjesec oslobađanja od vatre džehennemske. Ebu Hurejre, r.a., prenosi da je Muhammed, s.a.v.s., kazao:

"Allah je rekao: "Pripremio sam Mojim dobrim robovima, ono što oko nije vidjelo, što uho nije čulo i što čovjeku ne može ni naumpasti." (Buharija i Muslim)

U drugoj predaji stoji:

"Koji god vjernik sedam puta na dan zatraži utočište kod Allaha od džehennemske vatre, džehennem rekne: "Gospodaru, Tvoj rob te moli da ga spasiš od mene, pa ga spasi!" Koji god vjernik sedam puta na dan moli Allaha za džennet, džennet rekne: "Gospodaru, Tvoj rob te moli da ga nagradiš džennetom, pa ga uvedi u džennet!" (Tirmizi i Ibn Madže od Enesa r.a)

- Svemogući Allah kaže:

فَاذْكُرُونِي أَذْكُرْكُمْ وَاشْكُرُوا لِي وَلَا تَكْفُرُونِ.

"Sjećajte se vi Mene, i Ja ću se vas sjetiti, i zahvaljujte Mi, i na blagodatima Mojim nemojte neblagodarni biti!"
(El-Bekare, 152)

Stoga, povećajmo učenje zikra (jer se kod dobrih ljudi, od svih djela najviše ističe konstantan svakodnevni zikr, sjećanje i spominjanje Allaha, u svakoj prilici i na svakom mjestu), tako što ćemo na vidnim mjestima u svom okruženju (kući, stanu, na poslu, u školi) pripremiti, ažurirati i postaviti podsjetnike koji će nas podsjećati na zikr i spominjanje Allaha, počevši od najjednostavnijih riječi, preko dova, pa do učenja Kur'ana Časnoga koji je najbolji zikr. Odvojimo vrijeme da u samoći zikr činimo kako bismo očistili i uzdigli svoju dušu i srce.

Draga i poštovana braćo,

u mjesecu ramazanu Allah,dž.š. je propisao post koji možemo podijeliti na tri kategorije: post mase kojim se postači, sustežu od jela, pića i tjelesnih uživanja, post odabranih, koji pored navedenog, od grijeha čuvaju svoj sluh, svoj vid, svoj jezik i sve ostale organe i osjetila i post posebno odabranih, koji pored navedenog, poste svojim srcem i mislima i koji se potpuno posvećuju ibadetu Uzvišenom Allahu.

Molim Allah da budemo od onih koji će postiti mjesec ramazan postom odabranih ili posebno odabranih i da budemo od onih koji imaju pravo očekivati Allahovu dž.š. milost koju danas nasušno trebamo, koji imaju pravo očekivati oprost svojih grijeha i Allahovu dž.š. uputu. Zato ramazanskom tevbom (pokajanjem) obnavljajmo svoj iman a postom, namazom, sadakom, zekatom, lijepom riječju i dobročinstvom učvrstimo svoju poniznost pred Moći Stvoritelja.

Molim Svevišnjeg Allaha da nam dini-islam bude vjera, koju s predanošću i posvećenošću smatramo našim stilom i načinom života i da Muhammed a.s. bude naš poslanik i vjerovjesnik, kao najuspješniji učitelj ikada.

Svevišnji Allahu, molimo Te da nam podariš da u radosti, zdravlju i rahatluku spremni dočekamo mubarek ramazan, primljenih dova i tevbom-pokajanjem, očišćeni od grijeha i pogrešaka, da iskoristimo mjesec ramazan za ibadete i traženje pomoći samo od Tebe, da Ti se obraćamo i povjeravamo, samo od Tebe pomoć tražimo, pred Tobom svoje greške i nedostatke iznosimo, pred Tobom suzu iz poniznosti pustimo.

Svevišnji Allahu, molimo Te da nam se smiluješ, na Pravom putu nas učvrstiš i od nas svako zlo koje si stvorio udaljiš, da podariš nama i našim najmilijim svako dobro ovoga svijeta i svako dobro na budućem svijetu i sačuvaš nas vatre džehennemske.

Svevišnji Allahu, molimo Te da oprostiš grijeha naše i podariš nam zdravlje, čestitu porodicu, halal imetak, da nas sačuvaš kaburskog azaba i podariš vječnu sreću i najbolje društvo u najvišim stupnjevima Tvoga dženneta.

Svevišnji Allahu, molimo Te da nam podariš da pametno iskoristimo vrijeme u ovom mubarek mjesecu, jer je on kratkog vijeka, samo određeni broj dana, sati, minuta i možda drugog dočekati

nećemo, kao što Te molimo da ramazanski bajram dočekamo s najvećim mogućim benefitima i koristima koje vjernik, Tvojom milošću može zadobiti. Allahumme amin